

Sing vooraf: Psalm 119:62 (p. 598)

- 62 Help my, HEER! Ag, hoe verlang ek / en hoe sug ek diep en swaar
na die heil wat U beloof het, / na u kennis wonderklaar!
Laat my leef; o HEER, dan loof ek! / Laat niks my die heil ontroof!
Laat u oordeel my tot hulp wees! / Laat my lewe om te loof!

Ons hulp is in die Naam van die Here wat die hemel en die aarde geskape het.
Geliefdes, genade en vrede vir u van God ons Vader en die Here Jesus Christus deur die kragtige
werking van God die Heilige Gees.

Amen.

Lofpsalm 48:1, 5 (p. 243)

- 1 Die HEER is groot waar Sions top / hom wentel uit die dieptes op.
Hy is lofwaardig, waar verhewe / die berg en stad in songlans bewe,
en Sion teen die noorde / blink, bó die lof van woorde.
Daar waar in vlekkelose wit / die Koning van die wêreld sit,
het Hy, wat een die vyand waak, / as rotsburg Hom bekend gemaak.
- 5 Laat Sions berg weerklink van vreug! / Laat Juda's dogters hul verheug,
omdat Gods oordeel hul verbly het – / dié oordeel wat sy volk bevry het.
Aanskou die stad met skanse, / paleise, toringtranse –
hoedat hul pryk met nuwe prag. / En meld dit aan die jong geslag:
Die God is onse God, en Hy / sal tot die dood toe ons gelei.

Geloofsbelydenis: Apostolicum

Na die wet sing ons Psalm 9:12 (p. 38)

Wet

Psalm 9:12 (p. 38)

- 12 O oordeel vol geheimenis, / wat meld dat God regverdig is!
Hoe raak verstrik in eie nette / wie geen ontsag het vir Gods wette!

Gebed

- **Doksologie:**
- **Aanbidding:**
- **Skuldbelydenis:**
- **Vergifnis:**
- **Dank: Smeking vir die nood van die gemeente en voorbidding vir die kerk, owerhede en sondige wêreld, asook die beroep op die beloftes van God:**
- **Algemene bede:**
- **Verligting van die Gees ter wille van die Woorddiens:**

Amen.

Skrifberyming 18-6:1, 3, 4, 5 (nuut)

- 1 Ek sien 'n nuwe hemel kom, / 'n aarde nuut en vry.
Die see en al wat skei, verdwyn. / God self kom by ons bly.
- 3 Die Heer droog al die trane af, / verby is droefheid, dood.
Ja, pyn en smart wyk uit die hart – / ons moeite, angs en nood.
- 4 "Kyk, Ek maak alles nuut", sê God. / "Laat hom wat dors het, kom.
En hy sal vind hy is my kind; / Ek is 'n God vir hom!"
- 5 Oorwinnaars sal ons alles erf / en drink uit die fontein
van lewenswater, heerlijk rein. / En God sal oor ons skyn.

Skriflesing: Openbaring 6

Teks: Openbaring 6:12-17

En ek het gesien toe Hy die sesde seël oopgemaak het, en kyk, daar was 'n groot aardbewing; en die son het swart geword soos 'n harige sak, en die maan het geword soos bloed; en die sterre van die hemel het op die aarde geval, soos 'n vyeboom wat deur 'n groot wind geskud word, sy navye laat afval; en die hemel het weggewyk soos 'n boek wat toegerol word, en al die berge en eilande is uit hulle plekke versit; en die konings van die aarde en die grotes en die rykes en die owerstes oor duisend en die magtiges en al die slawe en al die vrymense het hulle weggesteek in die spelonke en in die rotse van die berge, en vir die berge en die rotse gesê: Val op ons en verberg ons vir die aangesig van Hom wat op die troon sit, en vir die toorn van die Lam; want die groot dag van sy toorn het gekom, en wie kan bestaan?

(Openbaring 6:12-17 AFR1953)

Wie is die Here wat ons beveel om Nagmaal te vier om Hom te herdenk en met Hom gemeenskap te hê? Wat belof Hy ons en waarheen is Hy met ons op pad?

Soos wat die Lam die Boek van God se ewige Raadsplan oopgemaak het, het al die seëls voor hierdie sesde seël die oorwinning van Christus beskryf met die oorloë en hongersnode en siektes wat daarop gevolg het, asook die weerstand wat die evangelie ondervind het.

- Met die oopmaak van die sesde seël tree die oordeelsdag in.
- Daarmee eindig die wêreldgeskiedenis.

Hierdie seël openbaar veral twee dinge:

- 1. Die ineenstorting van die skepping**
- 2. Die ineenstorting van die ongelowiges**

1. Die ineenstorting van die skepping

Hierdie sesde seël teken hoe die hele wêreld ineenstort.

- Meteens staan die hele mensdom dan in die oordeel van God.
- Die aarde wankel, die son word swart en verloor die vermoë om lig te gee.
- As gevolg daarvan word die maan rooi soos bloed (besoedeling?).
- Om alles te vererger, val die sterre van die hemel af op die aarde.
 - 'n Geweldige sterrereën word hier beskryf, want die Here openbaar dat die sterre sal val soos wat navye afval as die vyeboom geskud word.
 - Die navye in Palestina is vye wat kort voor die winter aan die boom se stam verskyn en dan nooit ryp word nie.
 - As die winterwinde dan waai en die vyeboom skud, val die wintervye af. Dis nou waarmee die val van die sterre vergelyk word.

Hierdie beeld beskryf die volkome en totale ineenstorting van die hemelliggame.

- Hulle verdwyn, daarom kan hulle nie meer hulle lig gee nie.
- Dit verklaar dalk waarom vers 14 sê dat die berge verdwyn het en die eilande verskuif geraak het op die aarde.
- Die hemele rol weerskante toe op soos 'n boekrol om 'n deurgang en 'n pad te maak waardeur die Here kom.

Die hele skepping en heelal stort dus inmekaar.

- Dit moet plek maak vir 'n heeltemal nuwe hemel en aarde.
- Die nuutheid is totaal – nuwe grondelemente, nuwe verhoudinge, nuut en glorieryk in Christus se oorwinning oor alle magte wat sleg is.
(Kyk hier na Openbaring 21:1vv; 2 Petrus 3:10vv).
- Dit lyk asof die ineenstorting van die skepping 'n toestand skep soos wat dit was by Genesis 1 – 'n toestand van donker chaos.
(Kyk hier na Matteus 24:29; Markus 13:24; Lukas 21:25; Joël 2:10, 31; Jesaja 13:10; 50:3; Esegïel 32: 7.)

U moet ook daarop let dat die Here hierdie dinge al in die tyd van die Ou-Testamentiese profete voorspel het. Luister net na wat in Joël 2:10, 30, 31:

Voor hulle bewe die aarde, sidder die hemel; die son en die maan word swart, en die sterre trek hulle glans in. (Joël 2:10 AFR1953)

En Ek sal wondertekens gee aan die hemel en op die aarde: bloed en vuur en rookpilare. Die son sal verander word in duisternis en die maan in bloed, voordat die groot en deurlugtige dag van die HERE kom. (Joël 2:30-31 AFR1953)

2. Die ineenstorting van die ongelowiges

Van vers 15 af volg daar 'n beskrywing van wat in hierdie oomblikke in die mensewêreld gebeur.

- Alle mense voel dit, sien dit en weet dit.
- Almal erken dit ook dat die einde en God se oordeel daar is – niemand twyfel enigsins nie.
- Almal word deur angste oorval – hulle wil wegvlug.
 - Hulle probeer ook!
 - Maar hulle besef dat vlug totaal onmoontlik is.

In hulle angste en vrees roep hulle dat die berge en die rotse op hulle moet val:

. . . en vir die berge en die rotse gesê: Val op ons en verberg ons vir die aangesig van Hom wat op die troon sit, en vir die toorn van die Lam;
(Openbaring 6:16 AFR1953)

- Dit gaan daaroor dat hulle wil wegkruip sodat die Here Jesus hulle nie sien nie.

Die beeld sluit aan by die begin van hierdie troongesig: **die aangesig van Hom wat op die troon sit, en vir die toorn van die Lam.**

Toe sê een van die ouderlinge vir my: Moenie ween nie; kyk, die Leeu wat uit die stam van Juda is, die wortel van Dawid, het oorwin om die boek oop te maak en sy sewe seëls te breek. (Openbaring 5:5 AFR1953)

en

En ek het gesien toe die Lam een van die seëls oopmaak; en ek het een van die vier lewende wesens hoor sê, soos die geluid van 'n donderslag: Kom kyk!
(Openbaring 6:1 AFR1953)

Die beeld van die Leeu en die Lam smelt saam, daarom kan die Lam toornig wees.

Alle grootheid en grootsheid van die mense is meteens weg. Alle wêreldse mag en rykdom is ook daarmee heen.

- Dit is duidelik dat dit vir hierdie mense 'n magsbasis gevorm het waarop al hulle sterkte gerus het.
- Hierdie magsbasis van hulle staan teenoor die gesag en die oordeel van God – hulle het God dus verwerp.

Dis hierdie mense wat met God gespot het, en hulle nie bekommer het oor God en sy wederkoms nie.

- Nou word hulle vervul met skrik wat jy nie kan beskryf nie.
- Daarom is daar iets van 'n belydenis in hulle uitroep: Die groot dag van sy toorn het gekom! Wie kan bestaan?
- Let wel: dis nie 'n uitroep van bekering nie.
 - Ook nie van aanbidding nie.
 - Dis 'n erkenning uit wanhoop dat die ding wat hulle al die tyd ontken het, nou besig is om te gebeur.

Kyk na die volgorde van maghebbers na die uitroep “Wie sal bestaan?”

- Eers word die hoogste maghebbers genoem:
 - Konings van die aarde (teenoor volke), die grotes (politieke figure), die rykes (met die geldmag),
 - owerstes oor duisend (militêre figure),
 - magtiges (invloedryke persone),
 - slawe en vrymense.
- Dis 'n sewevoudige opsomming van die mense volgens status, posisie, besittings sosiale orde.

Teenoor al hierdie mense wat in benoudheid rondvlug, is die gelowiges – die siele onder die altaar (v. 9).

Let daarop dat daar by hierdie maghebbers geen poging is om hulleself te handhaaf nie.

- Daar is ook glad nie sprake van enige teëstand teen die Here nie.
- In die ang en uitroepe van die ongelowiges is daar by implikasie 'n baie duidelike bevestiging dat die oordeel van God oor hulle regverdig is, en glad nie onredelik nie.
- Hulle word vergeld volgens die werklikheid van wat hulle geglo en geleef het.

Die teëpool van hierdie optrede is die liefde.

- Hierdie oordeel oor die onregverdiges is juis die voltrekking van God se liefde.
- Daarom word die Here hier *die Lam* genoem.

Die Lam het Homself juis gegee tot uitsuiwering van die sonde, en tot versoening van die ware gelowiges.

- **Toorn** voltrek die oordeel oor die wat God gehaat het.
- **Toorn** en **Lam** vat inderdaad oordeel en genade saam.

Die Here Jesus se kruisdood bewerk dus die ang en verskrikking oor die skepping en oor die ongelowiges.

Terselfdertyd, met dieselfde daad, bewerk die Here Jesus Christus genade oor die gelowiges. Die woord **Lam** verklaar vanself die Christusprediking van hierdie gedeelte.

- Die woord **Lam** verwys na die Here Jesus Christus se kruisdood.
- Die mense wat in ang uitroep dat die groot dag van die Lam se toorn aangebreek het, sien hier self die eindoordeel en die straf oor die ongelowiges wat daarop volg as die noodwendige gevolg van die Here Jesus se kruisdood.

Die oordeel vir die ongelowiges is die verlossing van? die gelowiges.

- Dit staan nie hier in Openbaring 6 geskryf nie, maar dit staan wel in die Bybel.
- Kom ons kyk na Matteus 24:29-31:
 - Eers word daar presies beskryf wat in Openbaring 6 staan, naamlik dat die son en die maan verduister word en dat die sterre val, en dat die hemele en die aarde geskud word.
 - Dan staan daar dat almal op die aarde dan die Seun van die mens sal sien kom op die wolke van die hemel. Hy kom met groot krag en heerlijkheid.

En dadelik ná die verdrukking van daardie dae sal die son verduister word, en die maan sal sy glans nie gee nie, en die sterre sal van die hemel val, en die kragte van die hemele sal geskud word. En dan sal die teken van die Seun van die mens in die hemel verskyn, en dan sal al die stamme van die aarde rou bedryf en die Seun van die mens sien kom op die wolke van die hemel met groot krag en heerlijkheid.

(Matteus 24:29-31 AFR1953)

Dan volg daar dié woorde:

En Hy sal sy engele uitstuur met harde trompetgeluid, en hulle sal sy uitverkorenes versamel uit die vier windstreke, van die een einde van die hemele af tot die ander einde daarvan. (Matteus 24:29-31 AFR1953)

Lukas 21:25 beskryf alles dieselfde, maar voeg dan hierdie woorde daarby:

En as hierdie dinge begin gebeur, kyk dan na bo en hef julle hoofde op, omdat julle verlossing naby is. (Lukas 21:25 AFR1953)

Die hele aangeleentheid het dus vir ons 'n bepaalde betekenis.

- Ons verwag die einde. Ons voel baie van hierdie dinge reeds aan die lyf, en ons sien dit gebeur.
- Nou is die vraag: Hoe moet ek daarop reageer? Moet ek bang wees, of wat?

As die dinge gebeur, moet dit jou geloof versterk.

- Want dit laat die ongelowiges beseef dat die Here Jesus werklik is, en dat Hy in die hemele verskyn om sommiges te oordeel en ander te red.
- Ons moet dus doen wat die Here sê in Lukas 21: Ons moet ons koppe optel en bly wees dat die ewige lewe aanbreek, want dit beteken dat ons verlossing naby is.

Onthou die sesde seël preek aan ons dat daar die allerverskriklikste dinge gaan gebeur wanneer die einde aanbreek.

- Daar sal angs wees en pyn en vrees soos wat niemand nog ooit gesien of geken het nie.
- Maar by alles sien ons die Een wat die oordeel voer en ons juis met sy oordeel verlos!

Hy is die Lam wat kom. Hy kom vir ons om sy genade volmaak waar te maak.

- Hy het gekom om ons te verlos.
- Hy kom weer, sodat ons die lewe op die nuwe aarde in sy volmaakte heerlijkheid kan ingaan.

Berei u voor om die verlossing wat Hy tot stand gebring het – en daarmee saam sy wederkoms wanneer ons in volmaaktheid in sy koninkryk ingeneem word – aan die Nagmaaltafel te herdenk.

Amen.

Slotgebed

Skrifberyming 5-3:2-5 (8:2-5)

- 2 U 't van die hemel hoog op aarde neer wou daal, / en ons vir God gekoop uit alle volk en taal.
Die losprys was u bloed, wat U vir ons gestort het, / waardeur ons, rein gewas, 'n priestervolk geword het
en konings in die ryk van onverstoorb're vrede, / om God te dien en eer in eind'lose ewighede.
- 3 Toe sien ek hoog bo my die skaar van eng'le staan
en 'k hoor hul sanggeluid wat deur die hemel gaan.
Hul staan wyd om die troon, self heerskappye en magte,
rondom die oudstes en die gérubs groot van kragte;
ontelbaar is hul tal, dis duisende maal duisend, / en 'k hoor hul koorgesang soos baie waters bruisend:
- 4 Die sondelose Lam, vir sondeskuld geslag, / is waardig om te ontvang die rykdom, wysheid, krag,
en eer en heerlikheid en dankb're seëninge! / En al wat leef en roer, al die geskape dinge
op aarde en diep omlaag, of in die hoë hemel, / al wat die see bewoon en in sy dieptes wemel –
- 5 die ganse skepping sing met krag van jubeltoon: / “Aan Hom wat heerlik is, hoog op die wêreldtroon,
en aan die Lam van God, self eewge Skeppings-Here, / sy ewig lof en prys en krag en roem en ere!”
Met “Amen, Amen!” het die gérubs opgesewewe. / Die oudstes het aanbid voor Hom wat ewig lewe.

Die genade van die Here Jesus Christus en die liefde van God en die gemeenskap van die Heilige Gees bly by u almal.

Amen.

Dr MJ du Plessis
Gereformeerde Kerk Bellville
Datum: 31 Mei 2009